

Dapli libertad d'agir per ils servetschs psichiatrici

■ **(anr/fa) Ils Servetschs psichiatrici grischuns (PDGR) survegnan dapli libertad d'agir sco interpresa. Il motiv è il midament tar la finanziaziun dals ospitals. Cun 104:0 ha approvà il parlament la lescha revedida.** A Bumaun 2002 èn vegnidas unidas las clinicas psichiatricas grischunas, las chasas da dimora ed ils lieus da lavur en ina instituziun da dretg public cun il num «Servetschs psichiatrici Grischun» (PDGR). La finamira era da dar uschia als PDGR la basa necessaria per pudair lavurar da maniera economica er en quests temps da pretaisas creschentas ad ospitals e clinicas. Ils stabiliments ch'ils PDGR ha prendì en locaziun han ina valur d'assicuranza dals edifizis da var 165 milliuns francs. Uschia è il portfolio d'immobiglias dals PDGR il pli grond dal chantun Grischun, avant la Scuola chantunala a Cuira. Quella ha ina valur d'assicuranza da var 85 milliuns

francs. Questa stad ha preschentà la regenza la missiva areguard la revisiun da la lescha davart l'organisaziun dals servetschs psichiatrici chantunals e da las chasas chantunals da dimora per persunas cun impediments psichics dal chantun Grischun.

Concurrenza da clinicas en auters chantuns

La revisiun da la lescha era daventada necessaria causa ils midaments en il sector da la finanziaziun dals ospitals: Dapi Bumaun 2012 pajan las assicuranzas las prestaziuns dad ospitals e clinicas tenor las novas pauschalas ch'èn orientadas a la prestaziun. «Causa questa nova lescha èsi vegnì necessari ch'ils PDGR daventian pli cumpetitivs», ha ditg la presidenta da la cumissiun predeliberanta *Gabriela Tomaschett-Berther* (pcd, Mustér), «ils assicurads pon nemp sa laschar tractar er en

auters chantuns e concurrenzeschans uschia nossas clinicas psichiatricas Beverin a Cazas e Waldhaus a Cuira.»

Ils puncts principals da la lescha revedida èn sco che cusseglier guvernativ *Christian Rathgeb* ha declerà il transferiment dals edifizis cun excepziun dal manaschi puril dal Waldhaus a la PDGR, in chapital da dotaziun da max. 10 milliuns francs sco era la pussaivladad d'agir da maniera economica e da far uschia reservas. «Il transferiment da las parcelas en dretg da construcziun duai a l'avis da la regenza contribuir sia part per augmentar la competitivitad dals PDGR», ha'l ditg. Senza cuntravusch ha decis il parlament da tractar la lescha en detagl. Suentar quella debatta s'ha la maioritad dal cussegl grond laschada persvader dals arguments da la cumissiun predeliberanta e dal schef dal departement per justia, segirtad e sanadad *Christian Rathgeb*: Cun

104:0 vuschs e 5 abstenziuns da la vusch ha approvà il parlament la lescha revedida. «Nus essan persvas ch'ils PDGR sappian trair a niz las bunas premissas decisas

quattras dal cussegl grond e ch'els cuntinueschian lur buna lavur», ha concludì la presidenta da la cumissiun predeliberanta *Gabriela Tomaschett-Berther*.

Purschida dals PDGR en tut il chantun

Ils PDGR procuran per la tgira psichiatrica dals creschids en Grischun. Questa incumbensa cumpiglia il sector staziunar ed ambulat, la purschida da clinicas dal di sco er chasas da dimora e lieus da lavur per umans cun in handicap psichic u spiertal. Ils PDGR mainan las clinicas psichiatricas Beverin a Cazas e Waldhaus a Cuira, ils trais centers da dimora Arche Nova a Landquart, Montalin a Cuira e Rothenbrunnen a Rothenbrunnen, las piazzas da lavur e d'occupaziun

(Arbes) a Cuira, Rothenbrunnen e Roveredo sco era en il manaschi puril dal Waldhaus a Cuira. Cun uras da consultaziun ambulantas, clinicas da di, dimoras, gruppas d'abitar sco era ils posts da lavur e d'occupaziun èn ils PDGR preschents en differentas regiuns dal chantun, tranter auter en Engiadina, Val Müstair, Puschlav, Roveredo, Grischun central, Surselva, Val dal Rain Grischuna e Partenz. Ils PDGR dattan lavur a totalmain 705 persunas.